

## KERIEKITHO

**Kijü mu themia chükeshü dze**

**1** Sietse nu Ukepenuopfü teiko mu kijü chüshü. <sup>2</sup>Mu kijüu we methuo mu puo rhijü; siro kezei thuo kesouko mho zepfü ba: siro Ukepenuopfü Ruopfüu dzüko mhoge meletuo. <sup>3</sup>Siro Ukepenuopfüa, zieliechie, sishü: sitse zie parta. <sup>4</sup>Sitse Ukepenuopfü kezieu viüchü ngulie: siro Ukepenuopfüa kezieu mu kezeiu bie kekreiwa. <sup>5</sup>Siro Ukepenuopfü kezieu pie Teiso üdi kielie, mu puo kezeiu pie Teizei üdi kielie. Siro thevatie mu khise bata: zha puo te.

**6** Süsie Ukepenuopfüa, dzüko nunu tei puo bu baliechie, süu bu dzüko mu dzüko pfü kekrewaliechie, ishü. <sup>7</sup>Sidi Ukepenuopfüa tei chüshü, mu süu bu puo mho rei puo khro rei dzü kebako chü kekreiwa: ru silie. <sup>8</sup>Ukepenuopfüa süu pie Tei tholie. Siro thevatie mu khise bata: zha kenieu.

**9** Süsie Ukepenuopfüa, tei khro dzüko bu vo thechü puo nu kengu batalie, di kijü keso bu parliechie, sishü: ru silie. <sup>10</sup>Sitse Ukepenuopfü kijü keso-u üse Kijü ülie; mu dzü kengukelieko üse Dzükezhako ülie: tsü Ukepenuopfüa süu viüchü ngulie. <sup>11</sup>Siro Ukepenuopfüa sie, kijüu bu nha, puo tsie kepfü gako, mu puo thuo puo si kepfü nhasiboko puo tsie puo nu ketuoko bu kijü mhoge baliechie, sishü: ru silie. <sup>12</sup>Siro kijüu-a nha, puo thuo puo tsie kepfü gako, siro puo thuo puo siu vüshüyakezha puo tsie kepfü seiboko pelhoushü: sitse Ukepenuopfüa süu viüchü ngulie. <sup>13</sup>Siro thevatie mu khise bata: zha seu.

**14** Siro Ukepenuopfüa, teizei mu teiso chü kekreshüketuo la kezieko bu teigei zhaliechie, süko bu zasiko, puotei kekreichüko, teisozhako mu teichieko chülie: sishü. <sup>15</sup>Siro uko bu kijüu va pezieshülie-

ketuo la teigei nu kezieko chü zhalie, sishü: ru silie. <sup>16</sup>Siro Ukepenuopfüa kezie kezhanie chüshü; kezie kezha bu khinhie mho mu kezie kechüu bu theva mho dinu di: puo themvüko rei chüshü. <sup>17</sup>Siro Ukepenuopfüa süko bu teigei zha di kijüu gei zieshüketuo chüshü, <sup>18</sup>teiso-u mu teizeiu mho baketuo, tsü kezieu nunu kezeiu bie kekrewaketuo la: mu Ukepenuopfüa süu viüchü ngulie. <sup>19</sup>Siro thevatie mu khise bata: zha diau.

**20** Siro Ukepenuopfüa sie, dzüko bu rhei ketuo kemele khunuoko pelhoushülie, sidi kijü mhoge perako bu tei kemethuo gei pruo tuolie, sishü. <sup>21</sup>Siro Ukepenuopfüa dzükezhako nu khunuo kezako chüshü, mu meleyakezha lhou ketuo khunuo kehoupourei, dzü nunu lhou keparko, u thuo u zho-u sese di, puo shü chü kepfü pera kheko rei u thuo u zho-u sese di: siro Ukepenuopfüa süu viüchü ngulie. <sup>22</sup>Sitse Ukepenuopfüa japie uko tsü di pushü, Nie si vülie mu kruoliechie, sidi dzükezhako nu dzüko ketshu chülie, mu kijü gei perako bu rei kruoliechie. <sup>23</sup>Siro thevatie mu khise bata: zha pengouu.

**24** Siro Ukepenuopfüa sie, kijü bu lhou ketuo khunuoko u thuo u zho-u sesekechü khashüliechie, perinuo, tsüu gou ketuoko, mu nhachüko u thuo u zho sesekechü parliechie, sishü: ru silie. <sup>25</sup>Siro Ukepenuopfüa u thuo u zho kese nhachüko chüshü, mu perinuoko, mu kijü gei gou ketuo kheko u thuo u rhi sesekechü chüshü: mu Jihova-a süu viüchü ngulie.

**26** Sitse Ukepenuopfüa pushü, uko u rhi nu nu themia chülie khe, u kemhie di: sidi süko bu dzükezhako nu khuoko mho balie, teigei perako. perinuoko. kijüu mu kijü gei gou ketuo khunuo

peteko mho baliechie. <sup>27</sup>Sidi Ukepenupfua puo thuo puo rhi nunu themia chüshü, Ukepenupfui rhi nunu puo-a themia chüshü; puo-a thepfu mu thenu chüshü. <sup>28</sup>Siro Ukepenupfua japie süko tsüshü: di süko üse, nie si vülie, mu kruolie, di kijüu ketshu chülie, di süu penyülie; tsu dzükeza nu khuoko mho, teirako mho, mu kijüu gei mele ketuo kheko mho baliechie. <sup>29</sup>Sidi Ukepenupfua sie, harie, a-a puo tsie kepfu ga peteko, kijüu ziegei ketuo khe, seibo kehoupourei, seibo puo si chü di puo tsie khashüyakezhako kha n tsüwate; süsü pie n cha chüliechie: <sup>30</sup>siro kijüu gei nhachü kehoupourei, teira kehoupourei, mu kijü mho gou ketuo kheko, puo kerheiro kenyiko, a ga kepejoko kehoupourei n bu n cha chüketuo la kha n tsüshüte, sishü: ru silie. <sup>31</sup>Siro Ukepenupfua puo mhatho peteko ngulie mu harie, süu vithor zo. Tsiu thevatie mu khise bata: zha sorouu.

**2**Siro teiko mu kijüu, mu süko kroko chü tseiliete. <sup>2</sup>Siro Ukepenupfua zha thenie nhie puo mhatho peteko chü tseilie: sidi puo-a puo mhatho chükelie peteko nunu zha thenie nhie rüleilie. <sup>3</sup>Siro Ukepenupfua zha thenie gei jashü, sidi süu chü kemesalie; kekrelamoü Ukepenupfui sünhie puo mha pelhoukeshü mu chükeschü kheko nunu rüleikelie la.

**4** Hakoha Ukepenupfui Jihova-a tei mu kijü chükeschü nhie tei mu kijü gei pelhoukeshü nuolhouko we. <sup>5</sup>Tsie ketso we kijü gei lie nu nha puo rei ba mo luo, mu nha nu ga puo rei lhou sier moluo; Ukepenupfui Jihova-a tei bu rü kijü gei tsur mo zo luochü la; mu kijüu chielieketuo themia puo rei tuo mo. <sup>6</sup>Derei kijü nunu mhoutsu puo sier, di kijüu zie pete pechieschü. <sup>7</sup>Siro Ukepenupfui Jihova rünyo nu nyophe üse themiau chülie, sidi kerhei thesü hapie puo nyhüki nu shüshü; sidi themia bu ruopfü kerhei puo chüte.

### Eden Zieu

**8** Siro Ukepenupfui Jihova-a Iden nunu niathutsatie nu tezie puo chüshü: sidi puo-a chükelie themiau khapie sünu shü. <sup>9</sup>Sidi Ukepenupfui Jihova-a seibo kehoupourei umhiki zivichüko, mu thecha keviko pelhoupie kijü gei shü, kerheiprübo-u rei khapie tezieu metsuo nu shü, siro kevi kesuo sikelie seibo-u rei sa.

**10** Iden nunu tezieu vaketuo la kerü puo par; sünnu kezata di cha dia chüta. <sup>11</sup>Kerieu za Pishon: süu suna keba Havila kijüu pete houpfui ba; <sup>12</sup>mu kijü süu suna vi: sünu delium mu oni tsiepfü ba. <sup>13</sup>Siro kerü kenieu za Gihon: Kush kijüu pete houpfui keba süu thuo zo. <sup>14</sup>Siro kerü useu Tigris: süu we Assiria mhodzütsa vokezhüu. Siro kerü udiaua Euftrat.

**15** Sidi Ukepenupfui Jihova-a themiau zelie di puo khapie Iden zie nu shüshü, puo bu süu theke mu se baketuo la. <sup>16</sup>Siro Ukepenupfui Jihova-a themiau ki die hakemhiechü khashü: Tezie nu sei kehoupourei geinu n thuo chü kehou chü lievi zo: <sup>17</sup>derei kevi kesuo sikelie seibo-u geinu we n bu chü lielho: no süu geinu chükeschü nhie no siata petuo zotie ru.

**18** Siro Ukepenupfui Jihova-a sie, themiau bu puo rübei keba vi molie; a puo kekhuohi puo chüshütuo. <sup>19</sup>Sidi Ukepenupfui Jihova-a nha nu nhachü peteko, siro teigei teirako pete chüshü; di themiau bu uko za tholienu di ze vor puo ki shü; mu themiau kehoupourei pie pelhoukeshüko kiekeliu se puo za chü phre tuota. <sup>20</sup>Sidi themiau perinuoko za tho phrelie, mu teigei perako pete, siro nha nu nhachüko pete; derei themiau la puo kekhuohi ngulie mo. <sup>21</sup>Süsie Ukepenupfui Jihova-a keze kesou se puo bu themiau gei vor, ru puo zeta; <sup>22</sup>süki puo-a puo tieru puo bielie, di puo chüu chü kemawa: siro Ukepenupfui Jihova-a themiau geinu biekelie tieruu se thenumia puo chülie, di süpfü ze vor themiau ki

shü. <sup>23</sup>Siru themiau sie, haha a ruko donu a ru zo mu a chü donu a chü ze : puo üse Thenupfü ütuo, Themiau geinu puo se parkelie la. <sup>24</sup>Süla themia-a puo puo mu puo zuo khawa di puo kimia kitsa vota-tuo : di sünie chü puo chütatuo. <sup>25</sup>Siro unie keninie methuo zo, themiau mu puo kimia, mu unie menga mo zo.

### Medokephiu mu Themia krüketa

**3** Hameseki tinyhü Ukepenupfü Jihova-a nhachüko chükeshü peteko ki puo do vikuo. Mu puo-a thenupfü üse, harie, Ukepenupfüa nnie bu tezieu nu sei peteko geinu chü hienushü ma? <sup>2</sup>Ru thenupfü-a tinyhü üse, tezieu nu seiboko geinu puo si hie bu chü lievi : <sup>3</sup>derei tezieu metsuo nu keba seibo-u geinu, Ukepenupfüa, nnie bu chü lielho; nnie siaketa keprei la nnie bu süu bie rei lielho, sishülie. <sup>4</sup>Sitse unyhü thenupfü üse, nnie kehouchürei siata lielho zo : <sup>5</sup>Ukepenupfüa nnie süu chükelie nhie nnie mhi mhirho parlietuo, sitse nnie rei kevi kesuo si di terhuomia mhietaketuo la si ba zo, silie. <sup>6</sup>Sitse thenupfü-a seibo-u geinu chü ro vituoü mu puo mhiki zivi, siro mia bu mhasiliketuo la mengukezhü seibo puoü-kechü ngulie tse süu si rielie di chülieta; siro puo khapie puo nupfu rei tsü di puo bu chülie. <sup>7</sup>Sitse unie kenienie mhi mhirho parta, mu unie methuo keba silie : sidi unie chiede nyü terhü kemalie di pie unie nei chülie.

<sup>8</sup> Sitse unie Ukepenupfüa tezie nu tei kemeku nu rühou ketuo pfe silie; sitse themiau mu puo kimia unie Ukepenupfü Jihova mhodzü nunu rüshü di tezieu seiboko donu thata. <sup>9</sup>Süsie Ukepenupfü Jihova-a Adam kie di puo üse, no kirapuo ba ga? si. <sup>10</sup>Sitse puo sie, a tezie nunu n pfe si zo, mu a methuo keba la miehiet; sidi a rüshüte; si. <sup>11</sup>Siru puo sie, supuonie no methuo keba pie n ki pu ga? No a n bu chü hienukeshü seu si chülieta zo mo nyü? <sup>12</sup>Sitse themiau sie, no thenumiapfü puo bu a ze' banu di

kha a tsükeshüpfü seu si pie a tsü di a bu chülietelie; ita. <sup>13</sup>Süsie Ukepenupfü Jihova-a thenupfü üse, no kedipuo chüwata ga? si. Sitse thenupfü-a tinyhü a sewa di a bu chüliete; sita.

<sup>14</sup>Sitse Ukepenupfü Jihova-a tinyhü üse, no mha hau chü kewa la kiriko pete donu, mu nha nu nhachü peteko donu n bu rüse kepfüu chütuowe, siro n bu n rhei chie n va pie rünyo zepfü di rüyetuo mu rünyo chü tuo tsotuo.

<sup>15</sup>Siro a thenupfü nnie donu kenguke-mvü khashüwatuo, tsü puo tsie mu n tsieko donu : puo n tsü pechütuo mu no puo phitsü pechütuo.

<sup>16</sup>Puo thenupfü üse, A n kechü mu n nuoni chü pekrashütuo; kezia nunu no n nuonuo penuotuo; mu n mengua n nupfu gei batuo, mu puo bu n mhokezha chütuo.

<sup>17</sup>Siro puo Adam üse, No n kimia pfe rünyü di, unhasiu, a die kha n tsü di, no süu chü lielho ikeshüu chükewa la : kijüu n la rüse pfüte ho; n bu n rheichie meyhumezhie di süu chüchütuo; t

<sup>18</sup>süu zohuko mu kikhahuko pelhou-shütuo; mu n bu lie nu gako chütuo;

<sup>19</sup>n zie rükhru nunu n bu niekhrüda chütuo we, no rünyo mevita kemochie; süu nunu n chükelie la : no sü rünyo ze ru, n bu rünyo mevilatatuo.

<sup>20</sup> Süsie themiau puo kimia za thopie Iv chüwa; puo-a lhou ketuo peteko krüpfü chü la. <sup>21</sup>Siro Ukepenupfü Jihova-a chüzhü pie Adam mu puo kimia unie boulie chüshü mu unie pfenei chüshüwa.

<sup>22</sup> Siro Ukepenupfü Jihova-a sie, harie, themiau kevi kesuo si di uko mia puo miehiet; mu puo puo dzie chapie kerheiprü seibo-u si biepie chülie di rhei sei tuota rei si lielhote, <sup>23</sup>süla Ukepenupfü Jihova-a puo bu puo pie puo chükelie rünyo-u chie chü tuonu di Iden zieu nunu puo ketsewa. <sup>24</sup>Sidi puo-a themiau whuowa; süsie puo kerhei seibo-

### KERIEKITHO 3

u cha khawaketuo la Cherubim mu  
zhiecha miü kemhie puo lutsa hatsa  
rüreikelie puo khapie Iden zieu niathutsa  
shüwa.

### THE HOLY BIBLE

*Angami Naga*

1970

10,000 Copies

The Bible Society of India  
20 Mahatma Gandhi Road  
Bangalore